

**COMUNICACIÓN 1/2009, de 30 de xaneiro de 2009, RELATIVA Á ENTRADA EN VIGOR DA ORDE DE 23 DE MAIO DE 2008 POLA QUE SE REGULAN OS PROCEDEMENTOS PARA A PRESENTACIÓN DE AVAIS ANTE A CAIXA XERAL DE DEPÓSITOS DA XUNTA DE GALICIA EMPREGANDO MEDIOS ELECTRÓNICOS.**

Pola Orde de 23 de maio de 2008 da Consellería de Economía e Facenda (DOG nº 115 de 16 de xullo de 2008) procedese a regular os procedementos para a presentación, cancelación e devolución telemática de avais ante a Caixa Xeral de Depósitos da Xunta de Galicia.

A Xunta Consultiva de Contratación Administrativa da Comunidade Autónoma de Galicia, dada a súa incidencia na contratación administrativa, considera oportuno poñer en coñecemento da Administración da Comunidade Autónoma, organismos autónomos, universidades públicas, entes de dereito público, sociedades públicas e demais entes públicos dependentes ou vinculados á Comunidade Autónoma o contido da devandita Orde.

Respecto á constitución (Art. 1.2) a norma indica que as persoas ou entidades que precisen constituír unha garantía en documento de aval na Caixa Xeral de Depósitos poderá facelo acudindo as entidades de crédito ou sociedades de garantía recíproca que teñan subscrito convenio ao efecto coa Xunta de Galicia, e estas, mediante tecnoloxías electrónicas autorizadas, xerarán os xustificantes que acrediten a constitución ou presentación dun aval ante a Administración Autonómica.

Este resguardo de constitución, xerado pola aplicación informática, contén ao pé un código seguro de verificación, que permite ao órgano comprobar en calquera momento a súa validez e vixencia a través da Oficina Virtual da Consellería de Economía e Facenda.

A norma tamén se ocupa de regular o réxime de cancelación e devolución dos avais presentados por medios electrónicos (Art. 6) e indica que cando a Caixa Xeral de Depósitos reciba por escrito o acordo de cancelación procederá a dar de baixa a garantía nos seus rexistros indicando tal incidencia á entidade avalista.

**INCIDENCIA NA CONTRATACIÓN ADMINISTRATIVA:**

1º.- No que afecta á contratación administrativa indicar que este sistema só é válido para a constitución de garantías definitivas, non provisionais (Art. 2.2).

2º.- Deberá engadirse nos pregos de cláusulas administrativas particulares a indicación de esta posibilidade de presentación de avais como sistema de constitución de garantía definitiva.

3º.- Se para acreditar a presentación do aval esixida no artigo 135.4 da Lei 30/2007, de 30 de outubro, de contratos do Sector público, o adxudicatario presenta o código de verificación do resguardo de constitución da garantía, os órganos de contratación deberán proceder á comprobación e verificación da

devandita constitución na Oficina Virtual da Consellería de Economía e Facenda (trámites tributarios/servizos de acceso libre/catálogo de servizos/verificación de documentos).

4º.- Respecto a cancelación, e a salvo as facultades do Director Xeral de Política Financeira para ditar instrucións futuras de desenvolvemento da Orde, ante a previsión de que se deberá remitir á Caixa Xeral de Depósitos un escrito do órgano de contratación co acordo de cancelación para dar de baixa a garantía nos seus rexistros ou de incautación do seu importe, xúntanse como anexo á presente recomendación sendos modelos orientativos de formularios de cancelación e incautación de garantías.

Polo exposto, a Xunta Consultiva, en sesión celebrada o día 30 de xaneiro de 2009, acorda **COMUNICAR** aos órganos afectados a norma de referencia e a súa incidencia na xestión da contratación administrativa.